

Dr. Ismaliza daripada pembiusan ke estetik

Oleh RABIATUL ADAWIYAH

KOH ABDULLAH

adawiyah80@gmail.com

MINATNYA dalam bidang perubatan sudah dipupuk sejak kecil lagi. Melihat watak doktor dalam majalah, drama atau filem menjadikannya lebih berazam untuk menjadikan karier ini sebagai sebahagian daripada hidupnya.

"Bapa saya ialah pembantu perubatan di sebuah klinik swasta, setiap hari melihat bapa bekerja di klinik menjadikan saya berazam untuk menjadi doktor. Jadi, saya boleh sambung apa yang bapa buat," kata Dr. Ismaliza Ismail.

Sebelum bergelar doktor estetik, dia merupakan pegawai perubatan dalam bidang pembiusan lebih kurang sembilan tahun di beberapa hospital

kerajaan.

Minatnya menghias diri dan menjaga kesihatan diri, mendorong Dr. Ismaliza meneroka bidang perubatan estetik. Semuanya bermula apabila Dr. Ismaliza mengikut suaminya ke Australia dan melihat perkembangan perubatan estetik di sana.

"Masyarakat di sana sangat menitik beratkan informasi dan mereka tidak membeli sebarang produk untuk kulit mereka. Oleh itu, saya juga merasakan perlu ada perubahan untuk dunia kesihatan kulit dan kecantikan secara keseluruhan di Malaysia.

"Kami (para doktor kecantikan) dapat berkongsi ilmu, bukan sahaja daripada rawatan kulit tetapi penjagaan kulit di rumah dan cara perlindungan.

"Contohnya, kalau kita ada jerawat, tidak cukup hanya sekadar membeli produk kecantikan di kaunter. Sebaliknya, kita perlu

ada maklumat yang betul mengenai kulit supaya boleh melakukan langkah pencegahan kelak.

"Semua itu dikongsi apabila berjumpa dengan doktor perubatan kecantikan. Ini antara sebab yang saya rasa perlu dikongsi oleh masyarakat," jelasnya.

Walaupun sibuk dengan jadual kerja di klinik miliknya, dia lebih suka berada di rumah bersama keluarga pada hari cuti.

Seandainya, ada waktu terluang, Dr. Ismaliza memilih untuk melancong kerana dia dapat pelajari tempat orang khususnya tentang budaya mereka.

Katanya, anak muda yang ingin menjadi doktor, jadikan ini pilihan yang terbaik dalam hidup.

"Secara jujur, saya bangga menjadi doktor kecantikan kerana dapat membantu masyarakat dengan cara saya sendiri," ujarnya.

INFO

Nama: Dr. Ismaliza Ismail

Kerjaya: Doktor estetik

Pendidikan:

- MD dari Universiti Putra Malaysia (UPM) 2005
- Diploma of American Academy of Aesthetic Medicine (AAAM)
- Sekarang sedang menjalani pendidikan jarak jauh dengan American Fellowship Anti-Penuaan dan Perubatan Fungsian

